



ILIDŽA

INFORMATIVNI BILTEN OPĆINE ILIDŽA

Decembar 2019. / Broj 187



Sretna Nova 2020. godina



ODRŽANA 33. REDOVNA SJEDNICA OPĆINSKOG VIJEĆA

Budžet 29.400.000 KM

Općinsko vijeće na 33. redovnoj sjednici održanoj 26. decembra 2019. godine donijelo je Budžet Općine Ilidža za 2020. godinu u iznosu od 29.400.000 KM, sa 19 glasova za i devet protiv. Najviše sredstava je izdvojeno za kapitalne projekte. Osim obezbjeđenja sredstava za nesmetan rad Jedinственог općinskog organa uprave za kapitalne projekte izdvojeno je 11 miliona. Od toga za nastavak projekta saobraćajnice tramvaj pruge Ilidža – Hrasnica izdvojeno je 1.190.000 KM, za žičaru Hrasnica-Igman, Vrelo Bosne-Golo brdo 200.000 KM. Za izgradnju puta Hrasnica - Zoranoići izdvojeno je 250.000 KM, asfaltiranje uz učešće građana 250.000 KM, rekonstrukciju i izgradnja kanalizacije 600.000 KM, regulacija, uređenje i čišćenje vodonika 686.000 KM, rekonstrukciju i dogradnju Pete osnovne škole Sokolovići 500.000 KM. U Budžetu za 2020. godinu za obrazovanje izdvojeno je 470.000 KM, za stipendije 300.000 KM, kulturu 450.000 KM, sport 494.000 KM, za jednokratne novčane pomoći svih kategorija 845.000 KM, za udruženje građana 600.000 KM, za izgradnju pomoćnog terena sa umjetnom travom KSC Hrasnica 200.000 KM, a za klimatizaciju u KSC



Ilidža "Sabit Hadžić" 130.000 KM. U Budžetu u 2020. godinu utrošit će se za poljoprivredne podsticaje i turizam 250.000 KM, te za oblast podsticaja START-UP 70.000 KM. Efikasan i uspješan proces srednjoročnog planiranja budžeta zahtijeva posvećenost i racionalnost svih relevantnih učesnika u budžetskom procesu. Općinsko vijeće donijelo je i Odluku o izvršavanju Budžeta Općine Ilidža za 2020. godinu. Tom Odlukom uređuje se: struktura prihoda i primitaka, rashoda i izdataka Budžeta Općine Ilidža za 2020. godinu, njegovo izvršavanje, prioriteta plaćanja, zaduživanje, izdavanje garancija, upravljanje dugom i finansijsko izvještavanje. Općinski načelnik može na zahtjev resorne

Službe, a na prijedlog Službe za finansije o obimu i vrsti rashoda i izdataka za preraspodjelu sredstava donijeti Odluku o preraspodjeli rashoda i izdataka u okviru odobrenog budžeta. O izvršenim preraspodjelama sredstava upoznaje se Općinsko vijeće uz Izvještaje o izvršenju budžeta. Vijećnici su upoznati i sa Izvještajem Društva za reviziju BDO BH d.o.o Sarajevo. Prema mišljenju Društva za reviziju BDO BH d.o.o Sarajevo, finansijski izvještaji prikazuju objektivno i fer poslovanje u svim značajnim stavkama, kao i finansijski položaj Općine na dan 31. decembra 2018. godine, te rezultate njenog poslovanja i izvršenje budžeta za godinu koja je tada završila. ■

Odluka o stipendiranju djece bez oba roditelja i djece bez roditeljskog staranja učenika i studenata u školskoj/akademskoj 2019/2020 godini

Općinsko vijeće Ilidža na 33. redovnoj sjednici donijelo je Odluku o stipendiranju djece bez oba roditelja i djece bez roditeljskog staranja učenika i studenata u školskoj/akademskoj 2019/2020 godini. Tom odlukom utvrđuju se uslovi za stipendiranje djece bez oba roditelja i djece bez roditeljskog staranja, učenika osnovnih i srednjih škola i redovnih studenata u školskoj/akademskoj 2019/2020 godini. Stipendirat će se njih 47, od toga osam

studenata, srednjoškolaca 13, a osnovaca 25. Za stipendiranje ove djece odobrena su sredstva iz Budžeta Općine Ilidža u mjesečnim iznosima i to učenicima osnovnih i srednjih škola po 75,00 KM, a redovnim studentima po 100,00 KM. Isplate sredstava će se vršiti počev od 01. oktobra 2019. godine, završno sa 30. septembrom 2020. godine. Za ove namjene iz budžeta bit će izdvojeno 44.700 KM. ■



Donesena Odluka o utvrđivanju javnog interesa za izgradnju kabinske žičare GLD 8 “Ilidža”, Vrelo Bosne - Golo brdo

Općinsko vijeće usvojilo je Odluku o utvrđivanju javnog interesa za izgradnju kabinske žičare GLD 8 “Ilidža”, Vrelo Bosne - Golo brdo. Općinsko vijeće utvrdilo je da je od javnog interesa izgradnja kabinske žičare GLD8 “Ilidža”, Vrelo Bosne - Golo brdo. Pravobranilaštvo Općine Ilidža 15. oktobra 2019. godine obratilo se Općinskom vijeću da se utvrdi javni interes za eksproprijaciju nekretnina u svrhu izgradnje kabinske žičare GLD 8 “Ilidža”, Vrelo Bosne-Golo brdo. Na osnovu prikupljene dokumentacije utvrđeno je da su se ispunili uslovi u skladu sa Zakonom o eksproprijaciji. ■

Prihvaćena Odluka o osnivanju stalnih radnih tijela Općinskog vijeća Ilidža

Pred vijećnicima je bila i Odluka o osnivanju stalnih radnih tijela Općinskog vijeća Ilidža. Općinsko vijeće Ilidža ima slijedeće komisije: Komisija za izbor, imenovanja i pitanja ravnopravnosti spolova, Komisija za Statut i propise, Komisija za budžet, privredu, finansije i ekonomska pitanja, Komisija za imovinsko - pravna pitanja i stambene poslove, Komisija za prostorno planiranje, mjesne zajednice, komunalne poslove i ekologiju, Komisija za zaštitu ljudskih prava, predstavke i prijedloge, Komisija za obrazovanje, kulturu, sport i pitanja mladih, Komisija za boračka pitanja, rad, zdravstvo i socijalnu politiku, Komisija za saradnju sa drugim općinama, nagrade, priznanja, praznike i obilježavanje značajnih događaja i ličnosti, Drugostepena stručna komisija, Etička komisija, Komisija za planiranje općinskog razvoja, Komisija za sigurnost, te Komisija za rješavanje zahtjeva za dodjelu novčane pomoći teško oboljelih lica i jednokratne pomoći ženama za sufinansiranje troškova medicinski potpomognute oplodnje. Sjednice komisija se održavaju po potrebi, a obavezno kada treba razmatrati materijale iz svoje nadležnosti koji su na dnevnom redu Vijeća. ■

Usvojena Strategija prema mladima Općine Ilidža 2020 - 2024.

Strategija prema mladima Općine Ilidža 2020-2024. je kao i prethodni strateški dokumenti za mlade Općine Ilidža temeljena na Zakonu o mladima Federacije BiH. Donošenjem ovog zakona 2010. godine, svi nivoi vlasti obavezali su se kreirati i usvojiti strategije prema mladima koje predstavljaju dokument institucija vlasti s programom, pristupom i djelovanjima prema mladima, što uključuje definisane probleme i potrebe mladih, strateške pravce djelovanja te ciljeve startegije i mjere za realizacije strategija. Općina Ilidža je u saradnji sa Institutom za razvoj mladih KULT provela sveobuhvatno istraživanje o položaju i potrebama mladih koji žive na području općine Ilidža. Na

osnovu podataka prikupljenih kroz istraživanje kreiran je dokument “Analiza položaja i potreba mladih Općine”. Mladi na području općine čine 22 posto stanovništva. Oni su izrazili veću potrebu za podršku u njihovoj mobilnosti što podrazumijeva podršku u odlascima na stručna usavršavanja, takmičenja i međunarodne konferencije. Jedan od problema koji je istaknut u analizi istraživanje je odlazak mladih u kladionice, što nije kvalitetno provedeno vrijeme, a ne posjećuju kina i pozorišta. Kako je navedeno potrebna je stručna psihološka pomoć i podrška mladima, kada se uoče prvi znakovi ovisnosti. Više od polovine mladih bi pokrenulo vlastiti biznis, ali im je potrebna podrška. ■

Prijedlozi akata o regulisanju imovinsko - pravnih odnosa

Na ovoj sjednici Općinsko vijeće je usvojilo i prijedloge akata o regulisanju imovinsko pravnih odnosa. Riješeni su zahtjevi Općine Ilidža - Odluka o utvrđenju javnog interesa za izgradnju žičare Vrelo Bosne - Golo brdo, te zahtjevi Nafije i Šahina Dedića, ispravka rješenja, Dijane i Željka Šutalo, rješenje o dodjeli zemljišta u svrhu legalizacije Ivice Baškarade prijedlog za obnovu postupka. Vijeće je upoznato i sa Informacijama o stanju i aktivnostima u oblasti rada sa mladima, sporta i kulture na području općine, te Informaciji o učenju i vladanju učenika osnovnih i srednjih škola na području općine Ilidža. ■



Općina Ilidža stipendira 387 nadarenih studenata i učenika

Načelnik Općine Ilidža prof.dr. Senaid Memić 17. decembra u sali Općine Ilidža uručio je Ugovore o stipendiranju nadarenih učenika i studenata.

Općina Ilidža i ove godine je stipendirala talentovane učenike u srednjem i studente u visokoškolskom obrazovanju u školskoj/akademskoj

2019/2020. godini. Stipendije je dobilo 387 talentovanih učenika i studenata i to 143 učenika i 244 studenta. Za ove namjene iz Budžeta bit će izdvojeno 356.160 KM

Mjesečni iznos stipendije za učenike i studente prve godine je 78 KM, a za studente od druge do šeste godine kreće se u rasponu od 96 do 120 KM

zavisno od postignutog rezultata u prethodnoj godini. Stipendije će se isplaćivati 10 mjeseci. Sredstva dodijeljena stipendijom se ne vraćaju.

“Danas mi je čast i zadovoljstvo izraziti ponos zbog vaših rezultata tokom godina i uspjeha u školovanju. Jedan od osnovnih postulata za mlade i za državu jeste obrazovanje. Imati znanje je nešto što vam niko ne može uzeti. Danas vas želim zamoliti, dragi učenici i studenti, da se uvijek ponašate kao dobri ljudi i ne dopustite da bilo šta naruši vaš integritet koji ste tako pažljivo stekli. Budite ljubazni i velikodušni prema ljudima koji se nađu na vašem putu. Sanjajte velike snove i u budite optimisti, hrabri i uporni čime god se bavili u životu” istakao je načelnik Memić.

Studentica Poljoprivrednog fakulteta, Džanisa Zalihić zahvalila je Općini Ilidža za stipendiju, rekavši da će joj sredstva biti korisna za kupovinu knjiga i izlaske. ■



Stipendije za 194 učenika i studenata u stanju socijalne potrebe

Načelnik Općine Ilidža prof. dr. Senaid Memić 23. decembra 2019. godine u Multifunkcionalnoj sali Općine Ilidža uručio je ugovore za stipendije za studente i učenike u stanju socijalne potrebe u školskoj/akademskoj 2019/2020 godini. Ugovore je dobilo njih 194, od toga 142 učenika srednjih škola i 52 studenta slabijeg imovnog stanja. Iznos stipendije za učenike je 75 KM, a za studente 100 KM i dodjeljivat će se 10 mjeseci. Za stipendiranje učenika slabijeg imovnog stanja Općina Ilidža iz Budžeta je izdvojila 158.500 KM.

“Vi koji ste se trudili, učili i radili i dobili ste stipendiju kao nagradu. Dodjela stipendija je nešto što je moja najdraža obaveza. To je mala pomoć u vašem školovanju, a ujedno i podrška vašem obrazovanju i investiranje u našu budućnost. Obaveza je nagraditi svakog ko svoje školske obaveze završava na vrijeme, ko je dobronamjeran, uči i ko poštuje sebe i druge. Na vama je da ove skromne pare utrošite kori-



sno. Želim vam puno sreće u vašem daljnjem školovanju, zapamtite da rad ne smijete podcijeniti i nije lahko dobiti nagradu za trud, vi ste naš ste ponos” kazao je u svom obraćanju učenicima i studentima načelnik Memić.

Riad Gojak, student Fakulteta za kriminalistiku i kriminologiju je istakao da će sredstva koja je dobio za stipendiranje utrošiti za školovanje, kupovinu potrebnih materijala za fakultet kao i za dodatne edukacije. Zahvalio je Općini Ilidža i smatra da se trud uvijek isplati i da je najbolja investicija obrazovanje. ■

Postavljeni novi radari na Ilidži

Na području općine Ilidža postavljena su kućišta za stacionarni radar na dvije lokacije: raskrsnica Butmirska cesta-Hrasnička cesta i Ilirska (kod skretanja za SIGMU), pravac Hrasnica-Ilidža, raskrsnica Butmirska cesta-Hrasnička cesta i Butmirska

cesta (kod stretanja za Butmir), pravac Ilidža - Butmir. Ograničenje brzine na navedenim dionicama je 60km/h. Postavljena je dodatna vertikalna saobraćajna signalizacija. Ministarstvo unutrašnjih poslova će izvršiti postavljanje kamera. ■



Načelnik Memić posjetio najstariju stanovnicu Ilidže

Načelnik Općine Ilidža prof. dr. Senaid Memić je 27. decembra posjetio najstariju stanovnicu općine Ilidža, nanu Sabiru Bunda. Tom prilikom načelnik Memić joj je uručio paket sa prehrambenim proizvodima, poželivši joj dobro zdravlje i još godina života. Nana Sabira je rođena 5. maja 1916. godine, izbjeglica je iz Foče i živi u Osijeku. ■



Potpisan Sporazum o finansiranju sanacije puta Hrasnica-Osmice

Uzgradi Vlade Kantona Sarajevo 13. decembra 2019. godine, ministar privrede Kantona Sarajevo Haris Bašić i načelnik Općine Ilidža prof. dr. Senaid Memić potpisali su Sporazum o finansiranju projekata iz oblasti sanacije i rekonstrukcije šumskih

puteva na području općine Ilidža. Ovim sporazumom predviđeno je sufinansiranje sanacije rekonstrukcije puta Hrasnica-Osmice (ratni put). Radovi će se finansirati sredstvima iz Budžeta Kantona Sarajevo za 2019. godinu kojim raspolaže Ministarstvo

privrede - Uprava za šumarstvo. Za ove namjene predviđeno je izdvajanje 210.000,00 KM. Općina Ilidža se obavezuje da će radove na realizaciji projekta okončati najkasnije do kraja septembra 2020. godine. ■



Novogodišnji prijem za direktore osnovnih i srednjih škola



Načelnik Općine Ilidža prof. dr. Senaid Memić 30. decembra 2019. godine upriličio je tradicionalni novogodišnji prijem za direktore osnovnih i srednjih škola sa područja općine, na kojem se razgovaralo o dosadašnjoj i budućoj saradnji Općine i škola, te potrebama i problemima i kako ih prevazići. Općina Ilidža je i ove godine izdvojila velika finansijska sredstva za škole na čemu su direktori škola izrazili svoje zadovoljstvo i zahvalnost. Načelnik je obećao da će Općina i u narednoj godini pomagati školama u poboljšanju uslova za rad.

“I ako nije naša nadležnost naša djeca su na prvom mjestu, i niko nam ne može osporavati da pomažemo. Zadovoljan sam sa vašim radom s djecom i nadam se da će i u narednoj godini naša saradnja biti još bolja” istakao je načelnik Memić. ■

Prijem za najuspješnije sportiste

Načelnik Općine Ilidža prof. dr. Senaid Memić upriličio je prijem 30. decembra 2019. godine za sportiste i sportske ekipe sa područja ove općine koji su ostvarili rezultate u 2019. godini. Tom prilikom načelnik im je uručio i novčana sredstva. Na prijemu su bili: Nermin Memić najbolji senior u paraplivanju, Ismail Barlov najbolji junior u paraplivanju, Hana Husković zlatna medalja na Prvenstvu BiH u plivanju (50 m-delfin), Damir Bajić, reprezentativac BiH u boćanju U-20, Daut Hamidović prvak BiH u slalomu i veleslalomu, ukupni pobjednik u svim discp., Tarik Zuhrić prvak BiH u slalomu i veleslalomu, ukupni pobjednik u svim discp., Ina Likić prvakinja BiH u slalomu i veleslalomu. Rezultate su postigli i Siniša Holik prvak BiH u avio-modelarstvu, Sara Holik prvakinja BiH u avio-modelarstvu, Halid Mekić reprezentativac SRVI KS

u bacanju kugle, Rahim Trtovac prvak BiH, reprezentativac BiH u taekwondou, Almin Avdović seniorski prvak BiH, reprezentativac BiH u taekwondou, Dua Ahmad 3. mjesto na Balkanskom prvenstvu u taekwondou, Adem Fetahović prvak BiH i reprezentativac BiH u olimpijskom boksu, Džemal Bošnjak prvak BiH i reprezentativac BiH u olimpijskom boksu, Alen Hadžić pionirski prvak BiH u olimpijskom boksu. U 2019. godini uspjeh su postigli i Halid Gakić juniorski prvak BiH u olimpijskom boksu, Meris Muhović seniorski prvak BiH i reprezentativac BiH u karate, Eldin Hajdarpasić U-21 prvak BiH i reprezentativac BiH u karate, Jusuf Suljić U-21 prvak BiH i reprezentativac BiH u karate, Anes Čongo seniorski prvak BiH i reprezentativac BiH u karate, Edin Sarić seniorski prvak BiH i reprezentativac BiH u karate, Ervin Galić seniorski prvak

BiH i reprezentativac BiH u karate, Anes Bostandžić kadetski prvak BiH i reprezentativac BiH u karate, Nermin Ramčilović U-21 prvak BiH i reprezentativac BiH u karate, Ajlin Kurtanović prvakinja države BiH i Balkanska prvakinja u karateu, Dina Mahmud U-21 prvakinja BiH u karate, 3. mjesto na Balkanskom prvenstvu, Edin Sinanović seniorski prvak BiH, reprezentativac BiH, plasman među 8 boraca na S.P, Albert Ugrinčić seniorski prvak BiH, reprezentativac BiH u kik boks, Ermin Hadžajlija juniorski prvak BiH, reprezentativac BiH u kik boks, Arman Herceglić juniorski prvak BiH, reprezentativac BiH u kik boks, Aldin Tahirović juniorski prvak BiH, reprezentativac BiH u kik boks, Mirza Mušanović pionirski prvak BiH u kik boks, Toni Miletić juniorski prvak BiH, reprezentativac BiH u judo-u. ■





Načelnik Memić i premijer Forto obišli prostor kasarne u Blažuju

Načelnik Općine Ilidža prof. dr. Senaid Memić i premijer Kantona Sarajevo Edin Forto obišli su 9. decembra lokaciju kasarne i upoznali se sa stanjem prostora u kojem trebaju biti smješteni migranti. Tamo su zatekli samo radnike koji čiste i obezbijavaju prostor. Prema informacijama koje su plasirane u medijima, a koje su tim putem saznali i premijer Forto i načelnik Memić, Ministarstvo odbrane BiH predalo je prostor na korištenje Ministarstvu sigurnosti BiH rano ujuro.

Premijer Vlade Kantona Sarajevo Edin Forto je podcrtao da je za izmještanje migranata upoznat iz medija i da je s načelnikom Memićem u dogovoru došao da obiđu lokaciju.

Načelnik Memić ponovio je da je za human pristup rješavanju ovog pitanja, ali s lokalnom zajednicom ne postoji korespondencija ni od strane državnog, a ni od međunarodnog nivoa.

“Niko se zvanično Općini Ilidža nije obratio. Ljudi koji predstavljaju državu su dužni da brinu o migrantima i moraju komunicirati sa lokalnim vlastima, jer smo mi nadležni za teritorije u našoj lokalnoj zajednici. Ne postoji komunikacija, ali hoću da vjerujem da je to zbog neiskustva ljudi koji su kao i do sada, napravili ono što ne valja. Nećemo dozvoliti da se gradi u kasarni ako se ne poštuju zakoni. Nećemo dozvoliti ništa što će ići na štetu stanovništva. Moramo zaštititi i djecu u školama, kuće u kojima niko ne stanuje, kao i sve stanovnike Ilidže. Neće biti nikakvih protesta na Ilidži ni u Blažuju, jer ovdje žive dobronamjerni ljudi koji znaju šta je nevolja”, izjavio je načelnik Memić, te još jednom pozvao sve međunarodne institucije koje se bave pitanjima migranata kao i državne institucije, da zajedno sa lokalnom zajednicom rade u cilju prevazilaženja svih eventualnih problema. ■



Načelnici Memić i Ejubović obišli migrante

Načelnik Općine Ilidža prof. dr. Senaid Memić i načelnik Općine Hadžići Hamdo Ejubović 12. decembra su posjetili migrantski kamp Ušivak. U Ušivku, kako su im rekli iz Međunarodne organizacije za migracije (IOM) postoji mnogo dobronamjernih institucija i organizacija spremnih da pomognu, ali da je potrebno da država artikulira aktivnosti. Zamolili su za asistenciju u nekim oblastima i poduzimanje određenih mjera.

Načelnik Memić je obišao i kasarnu u Blažuju u kojoj su smješteni migranti, te se upoznao sa stanjem na terenu.

Za migrante koji su smješteni u kasarni Blažuj, osposobljen je jedan dio zgrade za boravak, izvršena im je i registracija, te je obavljen osnovni pregled, a onima koji su imali teže zdravstvene probleme pružena je adekvatna zdravstvena njega. Načelnik Memić je još jednom ponovio da je za human pristup rješavanja ovog pitanja, ali da registracija mora postojati, kao i humani uslovi za boravak. Porodice sa djecom trebaju biti izdvojene i imati drugačiji smještaj, rekao je Memić. Prema njegovim riječima zbog blizine škole, Općina će angažovati security za obezbjeđenje. ■



Memić: Humani uslovi za migrante moraju postojati, a pred nama je veliki izazov

Uzgradi Vlade Kantona Sarajevo 13. decembra 2019. godine održan je sastanak predstavnika svih nivoa vlasti koji pokušavaju ublažiti situaciju na terenu s migranatima u Ušivku i Blažuju.

Načelnik Općine Ilidža prof.dr. Senaid Memić ponovio je da je potrebno poboljšati uslove za boravak migranata u kampovima Blažuju i Ušivku, s ciljem smanjivanja mogućnosti kriminala i preveniranja kriminalnih djela.

“Humani uslovi moraju biti za migrante. Pred nama je veliki izazov. Moraju se potpisati ugovori, sporazumi svih nivoa vlasti u kojima će se tačno znati ko je odgovoran za šta i ko ima kakva zaduženja. Prijevoz za migrante mora postojati. Oko osnovne škole mora se angažovati security” izjavio je načelnik Memić na sastanku. Pred zdravstvom je također veliki izazov da se ne desi širenje epidemije šuge, gdje je već uspostavljena impro-

vizovana ambulanta, ali kako je rečeno u kampu nema vode. Navedeno je kako je u toku polaganje cijevi za vodu i priprema bojlera za njeno grijanje.

Načelnik Općine Hadžići Hamdo Ejubović složio se da državne institucije nisu ništa pitale lokalne vlasti kada su kamp smjestile u prostor bivše kasarne Ušivak.

“Donošenjem takvih odluka promijenili su se uslovi života ljudi koji tu žive. Mi smo svjesni da se prostor mora negdje odrediti, ali smo tražili da to bitno ne poremeti uslove života ljudi u blizini, odnosno da se poštuju ljudska prava migranata, ali i ljudi koji su se rodili i žive na tom prostoru”, rekao je načelnik Ejubović.

Ministar MUP-a KS Admir Katica je dodao da postoje indikatori narušavanja sigurnosne situacije, što je zahtijevalo nove operativne planove, te da treba očuvati i turistički potencijal Sarajeva u narednom periodu. ■



Model energetske efikasnosti

decembra 2019. održan je sastanak sa vlasnicima objekata individualnog i kolektivnog stanovanja, auditorima, predstavnicima Općine i Sarajevske regionalne razvojne agencije-SERDA.

Učesnici sastanka upoznati su daljom procedurom provođenja projekta “Model poboljšanja energetske efikasnosti u zgradarstvu na području Kantona Sarajevo u funkciji povećanja broja korisnika (omasovljenje).

Cilj modela poboljšanja energetske efikasnosti (Model EE) koji implementira SERDA je doprinijeti da što veći broj građana pod povoljnijim uslovima izvrši utopljanje svojih objekata, a da se smanje troškovi grijanja i unaprijedi energetska efikasnost objekta.

Nakon objavljenog javnog poziva namijenjenog svim zainteresovanim vlasnicima individualnih stambenih objekata i etažnim vlasnicima u zgradama kolektivnog stanovanja da putem svojih predstavnika apliciraju na Projekat poboljšanja energetske efikasnosti

u zgradarstvu na području Kantona Sarajevo formirana je lista odabranih objekata iz općine Ilidža. Radi se o 15 vlasnika individualnih i tri objekta kolektivnog stanovanja. Na ovaj poziv je apliciralo 48 vlasnika objekata individualnih objekata i pet kolektivnog stanovanja.

Tokom sastanka, auditori su upoznali vlasnike objekata o budućim koracima s ciljem što uspješnijeg provođenja modela poboljšanja energetske efikasnosti u zgradarstvu na području Kantona Sarajevo u funkciji povećanja broja korisnika. Općina Ilidža je prepoznala ovaj projekat kao veoma dobar i načelnik prof.dr. Senaid Memić je uputio pismo namjere SERDI u kojem je istakao da će u 2020. Općina izdvojiti veća novčana sredstva za ovaj projekat u odnosu na prethodne godine.

Nakon izvršenih audita u planu je da se u 2020. godine provede javna nabavka za izbor izvođača radova za objekte za realizaciju ovog projekta. ■

Model poboljšanja energetske efikasnosti u zgradarstvu na području Kantona Sarajevo u funkciji je povećanja broja korisnika i predstavlja univerzalno primjenjiv, transparentan, nediskriminatoran i socijalno osjetljiv okvir za promociju i podršku projekta energetske efikasnosti u Kantonu Sarajevo, a provodi ga SERDA u saradnji sa Ministarstvom za prostorno uređenje Kantona Sarajevo i općinama. Osnovni princip na kojem se bazira model je otplata troškova mjera energetske efikasnosti (EE) iz postignutih ušteda što znači da za vlasnike zgrada na kojima se provode mjere energetske efikasnosti nema povećanja troškova zbog ulaganja u mjere energetske efikasnosti, pa im je slogan projekta: Utopli zgradu - Preplovi račun. U Općini Ilidža, 4.

Udruženje Iskon prikupilo pomoć za migrante


Dolazak migranata s Bliskog i Srednjeg Istoka nikoga nije ostavio ravnodušnim. U ljudima to izaziva različita osjećanja, od ljudske samilosti do nelagode i straha. Udruženje Iskon u saradnji sa Pomozi.ba, su od 28. novembra 2019. godine prikupljali pomoć za izbjeglice u hrani, zimskoj odjeći i obući. Ova akcija je trajala 20 dana, a punkt za prikupljanje pomoći bio je postavljen na lokaciji kod Mjesne zajednice Sokolović- Kolonija. ■

Obavještenje

Obavještavaju se građani i zainteresovana pravna lica, da će se **21. januara 2020. godine**, u MZ Blažuj (ul. Vlakovo br. 170) održati javni tribina i javna prezentacija za Regulacioni plan "Groblje Vlakovo".

Uvid u materijal i Kartu Koncepta RP "Groblje Vlakovo" može se izvršiti u prostorijama Općine Ilidža - prizemlje i u MZ Blažuj, u periodu od 09,00 – 15,00 sati radnim danom od 06.01.2020. godine do 20.01.2020. godine, te na web stranici Općine Ilidža.

Pozivamo građane kao i zainteresovana lica da prisustvuju Javnoj tribini i Javnoj prezentaciji, te daju svoje prijedloge, primjedbe i sugestije vezano za Regulacioni plan "Groblje Vlakovo". ■



Podjeljeno 4000 sadnica voća stanovnicima Ilidže

Općina Ilidža je i ove kao i predhodnih godina provela akciju podjele sadnica voća stanovnicima općine. Ukupno je podijeljeno 4000 sadnica od toga, 1250 šljive, 730 trešnje, 800 višnje, 220 jabuke, 50 kajsije, 750 kruške, 200 oraha. Distribucija i podjela sadnica stanovnicima obavljena je po mjesnim zajednicama. Prednost prilikom podjele imali su građani koji predhodnih godina nisu bili obuhvaćeni podjelom. Ovo je još jedna od akcija u nizu kojima Općina Ilidža pomaže stanovnicima u razvoju poljoprivrede. Za nabavku sadnica Općina je izdvojila 14.000 KM. ■



Kviz-Ko bolje poznaje BiH

U hotelu Hollywood na Ilidži 10. decembra predstavljena je redizajnirana verzija "Kviz BiH aplikacije, prvog online kviza o Bosni i Hercegovini. Projekat je podržala Općina Ilidža.

Aplikacija je od svog lansiranja, u decembru 2017. godine, ostvarila više od 33.000 preuzimanja. Prezentacijom i novim redizajnom aplikacija je dobila značajna unapređenja u vidu multiplayer opcije, prevedenih pitanja na engleski jezik kao

i novi broj pitanja koja će biti dostupna korisnicima.

Cilj kreirane aplikacije pomoći prvenstveno djeci i mladima da nauče više o domovini BiH.

"Vjerujemo da će nove opcije doprinijeti dinamičnijoj igri jer multiplayer opcija omogućava da igrate protiv vaših prijatelja u BiH i svijetu. Svakako, pitanja na engleskom jeziku dodatno će pomoći promociji BiH jer će korisnici koji nisu Bosanci i Hercegovci ili ne poznaju naš jezik,



biti u prilici da nauče nešto više o geografiji, kulturi, sportu, ekonomiji i drugim oblastima vezanim za BiH" kazao je Amel Duranović, autor aplikacije. ■



Perfektna jesen odbojkašica ŽOK Igmana

Završen je jesenji dio prvenstva u Superligi FBiH sa još jednom pobjedom ilidžanskih odbojkašica u širokom Brijegu. Impozantni skor od devet odigranih utakmica bez poraza govori nam da se Žokice ne šale i da je u ovoj sezoni samo jedan cilj, a to je plasman u elitni rang takmičenja, Premijer ligu BiH.

Ilidžanke su jedina ekipa bez poraza od 19 timova koji se takmiče u Superligi FBiH za žene.

Trener Damir Bahić nam je rekao da zasluge najviše pripadaju igračicama, ali da u klubu nema euforije zbog jesenje titule već da predstoji još ozbiljniji i teži rad kako bi se do kraja prvenstva ostalo na samom vrhu.

Iz uprave kluba poručuju da je njihova misija da Ilidži podare premijerligaša koji će dugo vremena tu boraviti i igrati značajnu ulogu u odbojci BiH, a podrška Općine Ilidža na tom putu je neizostavna. Iz kluba se zahvaljuju svima u lokalnoj zajednici koji ŽOK "Igman" prepoznaju kao ozbiljan i perspektivan sportski kolektiv.

Drugi dio prvenstva nastavlja se krajem januara, a do tada predstoje takmičenja mladih selekcija gdje ŽOK "igman" nastupa u sve tri kategorije. ■



Reprezentacija osnovnih škola Ilidža na kantonalnom takmičenju u nogometu treće mjesto

Kantonalno takmičenje u nogometu održano je 16. decembra 2019. godine u Kulturno-sportskom centru Skenderija. Učestvovala su sve selekcije iz općina sa područja Kantona Sarajevo. Reprezentaciju Općine Ilidža koja je osvojila treće mjesto činili su: Šeremet Bakir (Prva osnovna škola), Glušac Ersan i Hujdur Irhad (Druga osnovna škola), Bublin Ajdin i Karić Tarik (Četvrta osnovna škola), Pupalović Mirza (Peta osnovna škola), Pašić Ali, Alibašić Davud i Alibašić Vedad (Šesta osnovna škola), Čustović Imran (Osma osnovna škola), Pramenković Seid (Deveta osnovna škola). Trener reprezentacije Općine Ilidža Samir Sejfić istakao je da su učenici svojim ponašanjem pokazali da fer i sportskim nadmetanjem su pravi ambasadori školskog sporta, i da će sasvim sigurno u budućnosti postati dobri sportisti i još bolji ljudi. ■

Održan Festival košarke



U dvorani Devete osnovne škole u Rakovici, 08. decembra održan je Minibasket Festival košarke u organizaciji Košarkaškog kluba Ilidža i Općine Ilidža. Najspretniji u ovom takmičenju, osvajači prvog, drugog i trećeg mjesta, u kategoriji maxi bili su: Šejla Hodžić, Kenan Sinanović i Hana Vrabac. U kategoriji midi to su bili: Hanadi Jašarević, Emir Hadžić i Sumeja Pamić, a u kategoriji mini: Muhamed Ahmetović, Abdurahman Mucević i Hana Babalija. Ovaj projekat je podržala Općina Ilidža, te se iz KK Ilidža zahvaljuju na pomoći za realizaciju festivala. Košarkašice i košarkaši koji su tu od samog početka, odnosno od reaktiviranja kluba, još jednom su pokazali šta znači voljeti sport i biti vjeran svom klubu. Zajedno su pokazali da sport može i treba značiti i druženje i zabavu" izjavio je Admir Sakoč, direktor KK "Ilidža". ■

Uspjeh ilidžanskih sportista

Bosanskohercegovački bokser Džemal Bošnjak osvojio je zlatnu medalju i postao prvak Balkana u teškoj kategoriji (do 91 kg) ovogodišnjeg Balkanskog prvenstva koje se održalo u Antaliji. Bošnjak je i osvajač više međunarodnih turnira, a prema bodovima je i naj-

bolje rangirani bokser iz BiH. Adem Fetahović je ponovno dokazao svoj kvalitet osvojivši srebrnu medalju na Balkanskom prvenstvu. Na Balkanskom prvenstvu održanom u Breznici u Sloveniji, članovi Karate kluba Champion ostvarili su izvanredne rezultate. Anes Bostan-



džić zauzeo je prvo mjesto u kategoriji kadeta +70, osvojivši zlatnu medalju. Na treće mjesto u kategoriji U21 -69 plasirala se i Dina Mahmud.

Bilal Šuman osvojio je prestižnu titulu najboljeg trenera na devetnaestom "Izboru sportiste BiH" u organizaciji "Nezavisnih novina" i Radiotelevizije Bosne i Hercegovine. ■



Ekološko udruženje Aleja u posjeti vrtiću Radost

Članovi Ekološkog udruženja Aleja su 06. decembra posjetili vrtić Radost u Hrasnici. Tim povodom održano je predavanje o temi "Planeta zemlja" i "Reciklaža". Prikazana su i dva kraća filma na pomenute teme, a predstavnici ovog udruženja su se družili sa starijom grupom dječaka i djevojčica. Na kraju druženja mališanima su dodijeljeni i prigodni pokloni. ■



Paketići za 130 djece

U organizaciji Udruženja Zlatne ruke podijeljeno je 130 novogodišnjih paketića djeci sa područja Ilidže, Sarajeva i Istočnog Sarajeva i to djeci bez roditelja i slabijeg imovnog stanja. Iz ovog Udruženja se zahvaljuju donatorima Velidi Ahmetović, Šabanu Alijagiću, Damiru i Senadu Dizdareviću, Bibi Brkić i Medihi Almomani. ■



Podijeljene brošure ekološkog sadržaja

Aktivisti Ekološkog udruženja Aleja 21. decembra podijelili su brošure ekološkog sadržaja građanima općine Ilidža. Projekat Ekološka sekcija - izrada brošura o podizanju svijesti građana Općine Ilidža je realizovan u dva dijela.

U prvom dijelu projekta imali su obavezu da osmisle izgled i sadržaj, a

drugi dio projekta je podjela odštampanih primjeraka brošura našim sugrađanima. Cilj projekta je bio podizanje svijesti građana u odnosu prema okolišu i pravilno odlaganje otpada, sve u cilju podizanja stepena čistoće naše lokalne zajednice. Projekat je finansirala Općina Ilidža putem Javnog poziva. ■



Šašavko zabavio mališane

Uz prigodnu predstavu 28. decembra 2019. godine koju je izveo animator Šašavko, Općina Ilidža je i ove godine upriličila druženje mališana i podjelu paketića, sa Djeda Mrazom, djeci uposlenika Općine Ilidža i boračkih udruženja. Podjeljeno je 132 paketića.

Paketiće su dobila djeca uposlenika Općine Ilidža, njih 82, 26 djece općinskih volontera, 12 djece boračkih udruženja i 22 djece oboljelih od leukemije. ■

